

DEKLARACIJA O OSUDI GOVORA MRŽNJE

Skupština Tuzlanskog kantona je na 33. sjednici Skupštine, a na inicijativu Komisije za pravdu, ljudska prava i građanske slobode, usvojila Deklaraciju o osudi govora mržnje.

Deklaracijom o osudi govora mržnje:

1. Osuđujemo govor mržnje i izražavamo svoju spremnost na dodatni angažman u borbi protiv nje, te pozivamo na angažman sve institucije Tuzlanskog kantona s ciljem njegovog sprečavanja i sankcionisanja;
2. Pozivamo organe na svim nivoima vlasti a naročito na području Tuzlanskog kantona, kao i nosioce javnih funkcija, da se, svjesni svog uticaja, ustručavaju od govora mržnje i bore protiv govora mržnje;
3. Ukazujemo na potrebu dosljedne primjene krivičnog zakonodavstva kao i eventualnog pooštavanja odredbi u krivičnim zakonima o krivičnim djelima počinjenim iz mržnje;
4. Pozivamo medije da se sveobuhvatno, interdisciplinarno i interaktivno bore protiv govora mržnje, te da, svjesni svoje javne uloge i uticaja na javnost, maksimalno kontrolišu svoj sadržaj i onemoguće slučajeve zloupotrebe svog medijskog prostora za plasiranje govora mržnje, kao i da daju svoj doprinos u upoznavanju javnosti o tome šta je govor mržnje i kako se sankcioniše;
5. Posebno ukazujemo na rastući problem zloupotrebe interneta u svrhu širenja govora mržnje;
6. Ukazujemo na potrebu podizanja svijesti javnosti, civilnog društva i svih organa vlasti o krivičnim djelima počinjenim iz mržnje i primjerenim odgovorima na njih;
7. Prihvatamo organizacije civilnog društva kao partnere u borbi protiv govora mržnje i ohrabrujemo ih u aktivnostima koje preduzimaju radi borbe protiv govora mržnje;
8. Pozivamo institucije na svim nivoima vlasti u Bosni i Hercegovini na provođenje zakona i organe pravosuđa na maksimalno angažovanje, u skladu sa zakonskim nadležnostima, u sprečavanju i sankcionisanju govora mržnje;
9. Posebnu zabrinutost izražavamo zbog govora mržnje kojim se širi, podstiče, promovira i opravdava terorizam – najveća sigurnosna prijetnja današnjice, te zahtijevamo puni angažman nadležnih institucija i društva u cjelini s ciljem sprečavanja i sankcionisanja takvih aktivnosti.
10. Ova deklaracija stupa na snagu danom donošenja, a objavit će se u „Službenim novinama Tuzlanskog kantona“.

Usvajanjem ove deklaracije apelujemo na sve građane Tuzlanskog kantona i Bosne i Hercegovine da zajedničkom osudom ove destruktivne pojave pokažemo spremnost da se zauzmemo na sprečavanju takvog ponašanja i eskalacije govora mržnje.

Služba Skupštine Tuzlanskog kantona

Tuzla, 28.3.2017. godina